

# Hamim dakwa pengaruhnya semakin meluas

KOTA BAHARU, Jumaat — Seorang tokoh Hamim mendakwa bahawa pucuk pimpinan Pas, khususnya di Kelantan, sekarang gelisah kerana pengaruh Hamim dikatakan berkembang di kalangan bekas pengikut-pengikut Pas.

Ahli Majlis Pusat Hamim, Haji Abdul Hamid Salleh, berkata dalam satu kenyataan hari ini, bekas-bekas pengikut Pas di negeri ini, memberi sokongan penuh kepada Hamim dan memohon untuk menyertai parti itu.

Kenyataan itu sebagai menjawab dakwaan Setiausaha Penerangan Pas Kelantan, Encik Bunyamin Yaakob beberapa hari lalu bahawa Pas Kelantan tidak gentar dengan strategi Hamim di negeri ini.

Katanya, para pemimpin Pas sedikit masa lalu begitu yakin pendaftaran Hamim tidak akan diluluskan, sehingga ada yang sanggup memotong jari kelingking, jika Hamim diluluskan.

"Bila pendaftaran Hamim diluluskan, kini ternyata betapa gelisahnya hati mereka tentang perkembangan dan sambutan yang bakal diberikan oleh rakyat yang sadar akan kenyataan politik, dasar dan corak pimpinan Hamim di bawah Datuk Haji Asri," ujarnya.

Kata Haji Hamid, sebelum ini berbagai-bagai cacian dan kejian dilemparkan terhadap Datuk Haji Asri, antaranya mensifatkan Datuk Asri sebagai temucut, sampah sarap di tepi jalan, kerusi tua tidak boleh dipakai lagi

dan sebagainya.

Katanya, rakyat boleh menghakimkan sendiri mengenai kenyataan dan sikap pihak-pihak yang mendakwa mereka golongan yang benar-benar memperjuangkan Islam dan mencari keredhaan Allah.

Katanya lagi, kenyataan Setiausaha Penerangan Pas Kelantan itu membuktikan, keputusan pendaftaran Hamim menyebabkan Pas dan pucuk pimpinannya gelisah.

Mengenal dakwaan Encik Bunyamin bahawa Pas dan pucuk pimpinannya telah 'masak' dengan strategi Datuk Asri dan dapat menyelam 'apa yang tersirat dalam lubuk hatinya', Haji Hamid bertanya: "Dari manakah Saudara Bunyamin mendapat ilham mengenai niat dan isi hati orang ramai.

## Sumbangan Asri

"Barangkali dulunya Saudara Bunyamin ini seorang yang rapat hubungannya dengan Datuk Asri. Barangkali orang Pas sendiri lebih arif tentang hal ini bahawa dalam darah yang mengalir di badan orang yang bernama Bunyamin itu sendiri, terdapat beberapa titis hasil sumbangan Datuk Asri dan kumpulannya," kata Haji Hamid.

Katanya, Pas dan Encik Bunyamin sendiri tidak suka kepada Datuk Asri sesudah strateginya tidak berjaya. "Ini satu pengakuan yang berterus terang dan patut diberi tahniah," tambahanya.

"Ertinya kalau Datuk Asri menang dan berjaya, tentu Saudara Bunyamin tidak akan menunjukkan belangnya jadi Brutus yang menikam bekas pemimpinnya sendiri setelah si malang itu ditiak orang lain," kata Haji Hamid lagi.